

Entrante 1 juli 2025

KPA ta introduci proyecto piloto di bodycams



CUERPO Policial Aruba no ta para keto. Nos ta scucha nos comunidad y hunto cu avancenan tecnologico nos organisacion ta den pleno desaroyo pa ehecuta proyecto nan nobo cu ta encera cambionan grandi tanto pa nos di Cuerpo Policial Aruba y nos comunidad.

No ta un secreto bou di mando di altocomisario Arnhem su vision ta pa desaroya nos agentenan policial como tambe parti di digitalisacion cu enfoke riba tecnologia. Den e cuadro aki tin yen proyecto den tapara y ta andando manera: Radio di Polis nobo y moderno, Computernan nobo, Radarkamer, proyecto di Camara rond Aruba, proyecto di computer den patruya policial, tecnologia pa combati crimen etc.

E meta y vision di KPA ta inverti den nos profesionalismo. E siguiente fase aki ta un stap grandi pa nos di Cuerpo Policial Aruba cu introduccion di e proyecto Piloto di Bodycams entrante 1 juli 2025.

BODYCAMS un impacto nobo pa nos tur:

Estudionan a demostra cu bodycams ta contribui na transparencia, siguridad y profesionalismo. E puntonan aki ta cuadra netamente cu e pensamiento di nos organisacion policial. E meta ta pa fortalece transparencia y profesionalismo cu ta aumenta e siguridad pa nos comunidad y agente policial.

E proyecto aki ta Piloto. Polis uniforma lo cuminsa uza e bodycams. A regla cu Polis por uza e bodycams na cualkier momento den nan ehecucion di nan trabou. E agentenan a haya presentacion di e procedura con pa atende cu e bodycams. Tin regla y procedura pa cu e maneho di e imagennan di e bodycams conhuntamente cu Ministerio Publico. No por divulga of mira imagen sin cu tin autorisacion pa cu esaki y e ta conta tambe pa nos di Cuerpo Policial Aruba pa asina brinda e transparencia y siguridad.

Bodycams por trece desafio pa nos comunidad y cu tempo nos por custumbra cu esaki. Hunto nos ta dal un stap dilanti cu e bodycamnan tanto pa nos comunidad y agente policial.

Den region y Aruba ta sigui crece y bira profesional. Nos tambe kier crece hunto dor di inverti den e confiansa entre Polis y comunidad. Nos tey pa boso! Hunto nos ta traha pa un Aruba sigur, resiliente y transparente.